

IZVJEŠTAJ

o učešću potpredsjednika Vlade za međunarodne odnose i ministra vanjskih poslova Crne Gore mr Ervina Ibrahimovića na 47. svečanoj ceremoniji dodjele nagrada „Najmenadžer & Najkompanija“, Sarajevo, Bosna i Hercegovina, 25. juna 2026. godine

Potpredsjednik Vlade za međunarodne odnose i ministar vanjskih poslova Crne Gore mr Ervin Ibrahimović učestvovao je 25. juna 2026. godine u Sarajevu, Bosna i Hercegovina, na 47. svečanoj ceremoniji dodjele nagrada „Najmenadžer & Najkompanija“, održanoj u organizaciji Evropske nezavisne agencije za izbor i promociju najuspješnijih poslovnih ljudi i kompanija.

Manifestacija predstavlja jedan od najprepoznatljivijih regionalnih skupova posvećenih promociji poslovne izvrsnosti, ekonomskog razvoja i regionalne saradnje, okupljajući predstavnike institucija, poslovne zajednice, diplomatskog kora, međunarodnih organizacija, lokalnih zajednica i akademske zajednice iz Bosne i Hercegovine, država regiona i šire Evrope. Laureti u prethodnim godinama bili su bivši predsjednik Republike Austrije Aleksander van Der Belen, bivši predsjednik Republike Hrvatske Ivo Josipović, bivši predsjednik Republike Slovenije Borut Pahor, bivša potpredsjednica Vlade i ministarka vanjskih poslova Republike Slovenije Tanja Fajon, kao i druge istaknute ličnosti, iz političkog, naučnog i kulturnog života regiona i Evrope.

Poziv potpredsjedniku Vlade za međunarodne odnose i ministru vanjskih poslova Crne Gore mr Ervinu Ibrahimoviću upućen je od strane Direkcije Evropske nezavisne agencije za izbor i promociju najuspješnijih poslovnih ljudi i kompanija, povodom odluke žirija Direkcije evropske nezavisne agencije za izbor i promociju najuspješnijih poslovnih ljudi i kompanija od 28. marta 2026. da dodijeli najvišu nagradu pod nazivom „Zlatna plaketa – evropski najministar“ u okviru 47. po redu svečane ceremonije „Izbor a najmenadžera, najkompanija i ličnosti godine“.

U okviru ovogodišnje manifestacije organizovana je i poslovna konferencija pod nazivom „**Infrastruktura integracija kao pokretač razvoja i kohezije**“, na kojoj su razmatrane mogućnosti unapređenja regionalne povezanosti kroz razvoj saobraćajne, energetske i digitalne infrastrukture, kao i jačanje ekonomskih veza između država Zapadnog Balkana i Evropske unije.

ZNAČAJ UČEŠĆA DELEGACIJE

Učešće potpredsjednika Vlade za međunarodne odnose i ministra vanjskih poslova na 47. svečanoj ceremoniji dodjele nagrada „Najmenadžer & Najkompanija“ i pratećoj poslovnoj konferenciji predstavljalo je značajan doprinos daljem jačanju političke, ekonomske i diplomatske saradnje Crne Gore sa Bosnom i Hercegovinom, kao i afirmaciji regionalne saradnje kao jednog od ključnih prioriteta vanjske politike Crne Gore. Značaj učešća ogleda se u činjenici da je događaj okupio predstavnike javnog i privatnog sektora, međunarodnih organizacija, diplomatskog kora i poslovne zajednice iz regiona, čime je stvoren dodatni prostor za promociju investicionih i razvojnih potencijala Crne Gore, razmjenu iskustava i uspostavljanje novih kontakata sa relevantnim partnerima. Ovogodišnje izdanje je stavilo poseban akcenat na regionalno povezivanje i ekonomsku koheziju kao ključne pokretače razvoja.

Poseban značaj dodjeljivanja nagrade potpredsjedniku Vlade za međunarodne odnose i ministru vanjskih poslova mr Ervinu Ibrahimoviću, prema ocjeni Evropskog nezavisnog žirija, u čijem sastavu su Zijad Bećirović iz Slovenije kao predsjednik Žirija, Stjepan Mesić iz Hrvatske kao počasni predsjednik Organizacionog odbora i Nandino

Škrbić iz BiH kao direktor Projekta, ogleda se u činjenici da je nagrada zaslužena kontinuiranim radom, rezultatima rada i razvoja Ministarstva i izvanrednim rezultatima poslovanja i izvrsnosti Vlade Crne Gore, uz ocjenu da je potpredsjednik Vlade za međunarodne odnose i ministar vanjskih poslova veliki borac za stabilizaciju i poboljšanje odnosa među susjedima, kao i za jačanje privredne, kulturne i svih oblika saradnje, koji nastoji da rušenjem stereotipa pronađe najbolja rješenja u postojećim uslovima saradnje i prijateljstva.

Potpredsjednik Vlade za međunarodne odnose i ministar vanjskih poslova mr Ervin Ibrahimović istakao je da nagradu doživljava kao potvrdu prepoznatosti evropske politike Crne Gore, njene posvećenosti jačanju regionalne saradnje, stabilnosti, ekonomskog razvoja, kao i zajedničkoj evropskoj budućnosti. Naglasio je značaj regionalnog povezivanja i istakao da tradicionalno bliski i prijateljski odnosi dvije države predstavljaju snažan temelj za dalje unapređenje ekonomske saradnje. Ukazao je da se kroz zajedničku realizaciju ključnih regionalnih projekata, a posebno u oblastima infrastrukture i energetike, može direktno i dugoročno doprinijeti boljem kvalitetu života svih građana. Istakao je da Crna Gora, kao predvodnik procesa evropskih integracija na Zapadnom Balkanu, snažno i aktivno podržava evropsku perspektivu svih susjeda, i naglasio da su održiv ekonomski razvoj, otvaranje novih tržišta i snažna, institucionalna podrška privrednom sektoru među ključnim preduslovima za izgradnju stabilne, sigurne i prosperitetne budućnosti regiona. Posebno je istakao da Crna Gora ostaje trajno posvećena njegovanju dobrosusjedskih odnosa, međusobnog uvažavanja i jačanju regionalnog partnerstva kao osnove za punopravno članstvo u evropskoj porodici naroda.

Na marginama događaja ostvareni su kontakti sa predstavnicima institucija Bosne i Hercegovine, diplomatskog kora, poslovne zajednice i drugih učesnika manifestacije, tokom kojih su razmijenjena mišljenja o mogućnostima unapređenja bilateralne i regionalne saradnje u oblastima ekonomije, investicija, infrastrukture, turizma, energetike i drugih oblasti od zajedničkog interesa.

Učešće potpredsjednika Vlade za međunarodne odnose i ministra vanjskih poslova mr Ervina Ibrahimovića dodatno je doprinijelo afirmaciji Crne Gore kao pouzdanog partnera posvećenog regionalnoj stabilnosti, dobrosusjedskim odnosima, evropskoj integraciji i razvoju zajedničkih projekata od interesa za države Zapadnog Balkana.

PRIJEDLOG ZAKLJUČKA

Vlada Crne Gore je, na sjednici održanoj _____ 2026. godine, razmotrila i usvojila Izvještaj o učešću potpredsjednika Vlade za međunarodne odnose i ministra vanjskih poslova Crne Gore mr Ervina Ibrahimovića na 47. svečanoj ceremoniji dodjele nagrada „Najmenadžer & Najkompanija“, održanoj u Sarajevu, Bosna i Hercegovina, 25. juna 2026. godine.